

Na osnovu člana 13. Zakona o principima lokalne samouprave u Federaciji BiH ("Službene novine Federacije BiH", br. 49/06 i 51/09), čl. 48. st. (3) i (4) i 54. stav (3) Zakona o sportu ("Službene novine Kantona Sarajevo", br. 45/12-prečišćeni tekst i 36/21) i člana 10. Statuta Općine Centar Sarajevo-prečišćeni tekst ("Službene novine Kantona Sarajevo", broj 23/04), Općinsko vijeće Općine Centar Sarajevo na 11.redovnoj sjednici održanoj dana 30.10.2025.godine, donijelo je

O D L U K U
O NAČINU PROVOĐENJA JAVNOG INTERESA
OPĆINE CENTAR SARAJEVO U OBLASTI SPORTA

I DIO - OSNOVNE ODREDBE

Član 1.
(Predmet Odluke)

Ovom odlukom utvrđuje se način provođenja javnog interesa Općine Centar Sarajevo (u daljnjem tekstu: Općine) u oblasti sporta.

II DIO - JAVNI INTERES OPĆINE I DEFINICIJE U SPORTU

Član 2.
(Javni interes Općine)

- (1) Javni interes Općine u sportu, propisan odredbama Zakona o sportu (u daljnjem tekstu: Zakona) i shodno finansijskim sredstvima koja se obezbjeđuju u Budžetu Općine Centar Sarajevo za njegovo ostvarivanje su sljedeće aktivnosti:
- a) izgradnja, obnova i održavanje sportskih objekata od značaja za Općinu;
 - b) razvojni sport sa opredjeljenjem na masovnost;
 - c) organizovani sport za sve, posebno u funkciji zdravlja građana i kao preventiva devijantnom ponašanju;
 - d) sportski odgoj i obrazovanje u predškolskim ustanovama i osnovnim školama, uključujući i organizaciju takmičenja;
 - e) evidencija za područje općine;
 - f) druge aktivnosti za koje budu obezbijeđena sredstva u Budžetu Općine Centar Sarajevo:
 - 1) organizacija sportskih manifestacija masovnog karaktera, efikasnije korištenje prostornih vrijednosti teritorije Općine, te njihove ekonomske valorizacije kroz sport i rekreaciju,
 - 2) stvaranje uslova za besplatno korištenje sportskih objekata za djecu predškolskog uzrasta, učenike, studente i mlade,
 - 3) nagrade za ostvarene vrhunske sportske rezultate (pojedinačne i klupske),
 - 4) vrhunski sport.

Član 3.
(Javna ustanova)

Realizaciju određenih aktivnosti, radi stvaranja javnog interesa iz člana 2. ove Odluke, Općina će povjeriti javnoj ustanovi čiji je osnivač u skladu sa važećim zakonskim propisima.

Član 4.
(Sportski objekti)

Sportski objekti iz člana 2. stav (1) tačka a) ove Odluke su izgrađeni ili prirodni objekti namijenjeni sportu koji ispunjavaju uslove za održavanje treninga, takmičenja ili druge sportske aktivnosti.

Član 5.
(Vrhunski sport)

Vrhunski sport iz člana 2. stav (1) tačka f) podtačka 5) ove Odluke je priprema i takmičenje pojedinaca i ekipa koji su na najvećim međunarodnim takmičenjima ostvarili vrhunski rezultat.

Član 6.
(Razvojni sport)

Razvojni sport iz člana 2. stav (1) tačka b) ove Odluke je priprema i takmičenje pojedinaca i ekipa koji su svojim stručnim i organizacijskim mogućnostima prevazišli sport za sve, a nisu ostvarili vrhunske sportske rezultate.

Član 7.
(Sport za sve)

Sport za sve iz člana 2. stav (1) tačka c) ove Odluke je organizovana ili samoorganizovana sistematska sportska aktivnost svih građana.

Član 8.
(Sportski odgoj i obrazovanje)

Sportski odgoj i obrazovanje na području Općine iz člana 2. stav (1) tačka d) ove Odluke je sportska aktivnost djece koja se obavlja u nastavno-obrazovnom procesu u predškolskim ustanovama i osnovnim školama ili izvan nastavno-obrazovnog procesa neovisno o obliku pojavljivanja.

Član 9.
(Evidencija za područje općine)

Evidencija za područje općine iz člana 2. stav (1) tačka e) ove Odluke, ukoliko za istom postoji potreba, uspostavlja se i vodi na način propisan Zakonom i drugim podzakonskim aktima.

Član 10.
(Organizacija sportskih manifestacija)

- (1) Organizacija sportskih manifestacija masovnog karaktera iz člana 2. stav (1) tačka f) podtačka 1) ove Odluke je organizacija onih sportskih manifestacija masovnog karaktera koje imaju za cilj afirmaciju Općine, odnosno prepoznatljiv interes Općine u smislu afirmacije i popularizacije sporta.
- (2) Organizacija sportskih manifestacija masovnog karaktera iz stava (1) ovog člana podrazumijeva i sportske priredbe i velike međunarodne sportske priredbe koje se održavaju na području Općine.
- (3) Sportske priredbe iz stava (2) ovog člana su organizovani sportski susreti i takmičenja u sportu u skladu sa općim uslovima koje propisuje odgovarajući međunarodni strukovni sportski savez.

Član 11.
(Nagrade pojedincima i klubovima)

Nagrade pojedincima i klubovima iz člana 2. stav (1) tačka f) podtačka 3) su nagrade za postignute vrhunske sportske rezultate.

Član 12.
(Saradnja sa drugim organima)

Radi ostvarivanja javnog interesa u oblasti sporta, Općina će, putem službe nadležne za sport i javne ustanove čiji je osnivač, obezbjeđivati međusobnu saradnju sa nadležnim organima Kantona Sarajevo, Grada Sarajevo, općina i drugim nadležnim organima.

III DIO – FINANSIRANJE AKTIVNOSTI OD JAVNOG INTERESA

Član 13.
(Finansiranje aktivnosti od javnog interesa)

- (1) Općina će podržavati aktivnosti od javnog interesa Općine u oblasti sporta utvrđene u članu 2. ove Odluke, na način da će obezbijediti sredstva u svom Budžetu za njihovo finansiranje/sufinansiranje.
- (2) Sredstva za finansiranje/sufinansiranje aktivnosti od javnog interesa Općine u oblasti sporta iz stava (1) ove Odluke, planiraju se svake godine u Budžetu Općine Centar Sarajevo za narednu godinu u skladu sa općinskom politikom i programom općinskog načelnika.
- (3) Uslovi, način i postupak dodjele sredstava iz stava (1) ovog člana propisat će se posebnim pravilnicima koje će donijeti Općinski načelnik.
- (4) Javna ustanova iz oblasti sporta može sticati sredstva za zadovoljavanje javnog interesa iz Budžeta Općine na osnovu rezultata rada ostvarenih u prethodnom periodu i godišnjeg programa rada.

Član 14.
(Organizacije u sportu i javni poziv)

- (1) Organizacije u sportu - klub, sportsko društvo, sportski savez i organizacije za podršku sporta, definirane Zakonom, koje svojim djelovanjem ostvaruju javni interes Općine u oblasti sporta, mogu dostaviti svoje programe i projekte putem javnog poziva, čime se osigurava transparentnost dodjele finansijskih sredstava i omogućava dobijanje što većeg broja prijava, odnosno odabir najkvalitetnijih programa i projekata.
- (2) Za finansiranje programa i projekata iz stava (1) ovog člana, Općinski načelnik najmanje jednom godišnje raspisuje javni poziv, a u skladu sa planiranim stavkama u budžetu za tu godinu.
- (3) Javni pozivi se objavljuju na službenoj web stranici Općine Centar Sarajevo i sadrže uslove i kriterije koje organizacije u sportu moraju ispunjavati, rok i način za podnošenje prijava, te druge potrebne podatke, propisane ovom Odlukom i pravilnicima o kriterijima za finansiranje javnog interesa Općine u oblasti sporta.

IV DIO - ZAVRŠNE ODREDBE

Član 15.
(Donošenje Pravilnika)

Općinski načelnik će u roku od 30 dana od dana stupanja na snagu Ove odluke donijeti pravilnike o kriterijima za finansiranje javnog interesa Općine u oblasti sporta, kojim će se detaljno regulisati način i kriterije za dodjelu sredstava iz Budžeta Općine, ukoliko već ranije nisu doneseni akti kojim je regulisan način dodjele sredstava za pojedine programe iz oblasti sporta u Budžetu.

Član 16.
(Izmjene i dopune ove Odluke)

Izmjene i dopune ove odluke vrše se na način i po postupku za njeno donošenje.

Član 17.
(Prestanak važenja)

Danom stupanja na snagu ove Odluke prestaje da važi Odluka o načinu ostvarivanja javnog interesa Općine Centar Sarajevo u oblasti sporta ("Službene novine Kantona Sarajevo", broj 11/02).

Član 18.
(Stupanje na snagu)

Ova odluka stupa na snagu narednog dana od dana objavljivanja na oglasnoj ploči Općine Centar Sarajevo, a naknadno će se objaviti u „Službenim novinama Kantona Sarajevo“.

Broj, 01-45-813/25
Sarajevo, 30.10.2025.godine



**Predsjedavajući Općinskog
vijeća
Benjamin Išović**

Benjamin Išović

Objavljeno na oglasnoj ploči Općine Centar Sarajevo dana
31-10-2025